

FLOREAN DAL PALAZZ

AL SALTE FUR LA JOIBE

A CINQ CENTESINS IL NUMAR -- BÈZ SUBIT

Si vend a la librarie L. Ferri, all'Edicole e dai Tabachins in Marciatvieri, in piazza Contarene e S. Bortolemio.

Abonamens:

Par un An quatri francs; par 6 mes doi francs;
Par l'estero il dopli.

Inserzioni:

Intindisi cu la Redazion. Mandà letaris al simplis
indirizz: **Aminist. Florean dal Palazz - Udin**

FLOREAN AI LETORS

Chest al è il prin numar da l'an quart dal sfuejut popolar, tant ben vidut e riserciat, dai galanzumin, intindinsi ben, parceche lis canais lu viodin come il fum tai voi.

Anzi, cialait, si osservave in chesg diis plui di une muse legre, che par solit e mostrave di jessi lunge un metro, crodind che Florean dal Palazz al foss muart e ance sepolit.

No jè cussi, al diis il popul, e vòs di popul e jè vòs di Dio.

Dunce, udines diletissims, ciars Furlans, e sàvare che Florean, dopo tre agns di lung e costant lavor; lavor che al è stat di qualchi vantazz cuintri l'imposture, il fals patriotismo, l'usure e altris ciativeris che tormentin l'umanitat; al ha olut ciolisi un poce di vacanze, fa un poce di feste, cialà ce che al dis e al fas il mondat e ridi parsore sol solèt, gioldinsi a spalis dai ingenu che crodin ai modernos apuestui da la stampe cussi dette serie, che predicin la libertat, la moralitat, la fratelanze, l'eguaglianze e altrettantis bielis robis che vignaran il di..... dal judizi.

Uè Florean al è stuf di tase, nol po sta plui in strope, e par conseguenze al torpe a favelà clare nett come pal passat. Al anzue anzi che guuve e bràs colaborators e rindaran il sfuei simpri plui interessant, util e divertent; par cui nol reste che a dugg i Furlans di compralu. Al coste, come il solit, **cinq soi centesins**; cui che ul abonassi, **quatri francus** a l'an; **doi francus** ogni sis mes. **Par l'estero il dopli**. Spedi letaris, articui, corispondenzis, vaglia postai, valors, ecc. ecc. al simplis indirizz: **Ufizi dal giornal Florean dal Palazz, Udin.**

Animo dunce e anin indenant, simpri indenante cui che ha rabie che si speli!

FLOREAN.

MEMORIS DI FLOREAN

Dopo tant timp di silenzio, che a mi par un secul, di jessi senza i miei ciars letors, o hai bisugne di ricuardà da lis memoris, tant par tornà in clarezzade e par che no crodin ciarts tipos di sgghindale a bon prezì.

No, Florean a qualunque cost, al starà simpri pe veretat e pe justizie e lu ripet pe centesime volte che il timp al è galantomp.

Che se qualchi volte lis aparenzis o lis ciativeris di ciartuns che han la coscienza maglade e fàresin viodi il contrari, chest nol ul di nuje, parceche o uè o doman il just al trionfe.

Dunce uè o hai obligh di visà che ancemò la partide de

Maghe di borg di Viole

no jè sciarade. Al è un piezz veramentri che la facende si remene, si striscine, si slunge, si scurte, si drezze, si stuars, propri come chei ginastichs che si viodin ai sals ance in Zardin.

Ma, par altri, ogni ciosse e dèvi vè fin e cussi, almanco pal decoro de Justizie ufizial, e finarà ance cheste de famose Maghe, condanade dal Tribunal di Udin, da la Cort d'Apelo di Vignesie e che ancemò e jè a ciase so, libare citadine di une gran nazion!

O mi maravei anzi che in chest fratimp la celebre Maghe no vevi mitut parsore la so puarte tante di tabelle cui rispetivs titui di profession, dal moment che lis Sentenzis dai Tribunai no valin une pipe di tabac.

Al ul di che se no la ha mitude, la metarà; *nil sub sole novi*, e cussi o sperì di viodi ance cheste.

Dopo de Maghe, tant benemerite di Florean, no puèss dismenteà lis mès ciaris

Ancelis dal Redentor.

Daur chell che o hai podut capì e che mi han riferit i miei satrapos, lis Ancelis e saressin diventadis flapis.

Parcè mo? Ma, uè no soi in grad di rispuindi cun esatè cognizion di cause: del rest e savès anco voaltris ce che ocor a diventà flaps, massime po a une pivele. Us è facil par conseguenze di dedusi lis causis che puedin ve prodòte cheste flaperie che jo, in ogni mud, no cròd general.

Ma, come che us hai dit, uè no puess slungiami su chest argument che al richied veramentri robis lungis e gruessis.

Starin a viodi ce che al nassarà pal prossim numar.

Un altre simpatiche cognossinze dai letors di Florean e jè la.

Tabachine sta cujete

che viceviarse no sta mai cujeto.

An d'ha fate une des sos solitis che o contarai detagliatamentri quand che o varai plui spazi di uè. Simpri a proposit des sos aspirazioms di paronanze assolute de buteghe di tabach te contrade dai.... usatei!

Ma, lass'n là cumò, aghe in boce e a riviodisi Joibe che ven.

Lis massaris

min d'han sgnacadis di bielis e di gruessis intant che jo o sol stat cu lis mans in sachete pipand un sigar di Selle che al è diventat pies cumò che al coste vot centesins.

O farai une rassegne special tai prossims numars da lis gestis famosis di cheste nobil classe de sozietat che va fasinsi simpri plui teribil e pericolose.

An sarà par dugg i gusg, parceche i jentrarà il soldat e il moscardin, il servitor e il paronsin. *Atenti!*

On varess di passà in riviste di ches pocis di robis, ma, mi voressin almanco cinq numars in t'un sul Florean.

Bisugne dunce che o mi contenti di chell poc che o puess ramentà, riservanmi in seguit, man man che al ocor, di dai la passade a chest e a chell.

Mi pararès po di mancià a un dovè di cortesie e di.... cavalarie insieme se o mi dismenteas des nestris biells, cocolonis

Sartorelis

lis quals e han aumentat il debit di gratitudine che Florean al ha par lor.

Infati, dopo sospindut il sfuel, lis nininis e han dat une sospirade di sodisfazion, e han ciapat flat, si son sintudis un pes di manco sul stomi.

E han dit fna lor: cumò no vin plui Florean che al vegni a cialà cemud che vistin e cemud che scarpin, se vin il cul pustizz grand o pizzul, se lis tetis e son falsis o buinis, duris o flapis, tiradis su

a fuarze di bust o manco; se i tachs dai stivalins e son bass o als, dress o stuars, se i clavei e son rias naturalmentri o artificialmentri mediant il fiar ciald, se l'abit che vin intor lu vin pajat no altris, opur..... qualchidunaltri, se a ciase o mangin polente e sardelon, opur colombins rosg, se la ciamese e jè neta opur..... piturade, se.... insume tantis e tantis robis, da lis quals Florean si occuparà cun dutt amor, impegno e ativitat.

E lis

Bigatis?

mi domandarès voaltris, sono di butà vie, di lassalis in t'un cianton, come robe che no conte nuje?

No, no, ciars letors, anco ches e restaran sott la benevole protezion di Florean, il qual nol manciarà di tignilis in dute la so alte considerazion ogni qual volte al ocorarà.

E cussì la

Sette nere

e jè avertide che Florean la sorvegliarà par denunzia al publich dutis lis porcadis, lis purcineladis, e lis ipocrisiis che comètt; anzi un special collaborator al si incariche di cheste partide interessantissime quant mai.

E varàn la so part la pulitiche, la leterature, la economie publiche, i teatros; insume a la diriture une enciclopedie.

Par raggiungi chest scopo, di fassi benvolè dal publich cul servilu come che va, Florean nol sparagne fadia, nè spesis; par conseguenze al ha fiducie di vignl apogiat moralmentri e materialmentri.

Prime di fini al pree ches classis, o grops, o personis singolis, che no son nomenadis in chest articul, di no crodi di sujale cussì a bon marciat; a so timp e lug e varàn dugg il so, simpri par altri cun lealtat, veretat e justizie.

Anzi, scusalt, ma o scugni visà (*dulcis in fundo*) i.

Usuraris

a stà ben in uardie, parceche Florean nol sparagnarà di squajaju e di indicaju al publich, cui fàs a la man ben intindut, par ches perlis che son!

E par uè baste cussì; salut e bez a dugg i miei ciars Udines e Furlans in general.

FLOREAN

FLOREAN IN CARNEVAL

Alegris, alegris, che la malinconie no mance, e almanco une volte a l'an butin ju la muse dure e che la vada!

A Udin, par di la sante veretat, no mancîn lugs di divertîssi e cui che ha passion di balâ al ha ce scielzi. And'è par dugg i gusg e par dutis lis borsis.

Cui che nol è difil di contentâ e che al ul spindiu curs e ben al va al Pomo e la di Cecchin, sicur di gioldise miezz mond. Florit e Gregoris e son doi brâs diretors d'orchestre e il nestri popul al sa apreza i lor meris cul concori numeros tes salis dal Pomo e di sior Checo.

L'aristocrazie po, o che altre robe che ul jessi aristocratiche par fuarze, e ha i grang veglions al Minerve; veglions che oramai e son diventas une celebritat. Cui dis veglion al Minerve al dis precision di orchestre, dirute dal brâv Jacum Verza, al dis lusso, proprietat, eleganze, sfarzo di dutt, comprindut mangiâ ben e bevi mior.

Peciat che ai veglions cussî biei e tant rinomâs par dutt l'orbe terraqueo e in altris lugs ancemò, no si azunsi un poc di plui brio, un poc di plui spirt tes mascaris, come che al jere tai carnevai di une volte. Ma! cui sa che no si movin un poc a la volte!

Il ritrovo po plui simpatic, plui legri, plui scich, plui brillant, al è chell bombon di teatro Nazional, che si adate cussî ben, cussî magnificamentri anzi ai veglions de domenie. Si riscontre ance plui slanz, plui legrie, plui brio che tai altris lugs; al par quasi che l'ambient istess al dei l'intonazion festose e ciassose dai bai in chest teatro zentil e grazios.

Natural che dutt chest al contribuîs a rindi popolatissims i veglions dal Nazional di int dute pulide, zoventut dal alt e dal medio ceto; frutatis che son zojei di belezze, di zoventut, di formis volutuosis. Ah, che mi ven l'aghe in boce nome a pensai sul!

Ma no bisugnê dismentê che a rindi simpaticons i veglions dal Nazional i uelin dutis lis curis e lis premuris, e lis brauris, e tantis altris robis che finissin in *uris* dal nestri sior Titute Pinzan che nol sparagne nuje par mantignl alte e onorade la fame, ben meretade, dal so teatro. Brav sior Titute, dugg i Udines e i Furlans in general i bataran lis mans e lu proclamaran benemerit dal Carneval!

E zà che sin in discors si hal di lassâ di bande che mace di Gigi Casioli che cun chei ociai, perpetuamentri pojas sul nas, al par un mago cu la bachete in che orchestre, ecelent sott ogni aspîet? Veramentri a di ben di Gigi Casioli al è come puartâ aghe al mar e class te Tor; parceche dutt il Friul sa che il mestri dal Nazional al sa fa balâ ance i muars. E la prove e jè che la zoventut che bale, e che i plas di balâ ben, a preferenze e corr al Nazional a congratulassi cun sior Titute e a bati lis mans a Gigi Casioli.

Joibe che ven o publicarai qualchi aventure di Carneval, par completâ la rubriche sott chest titul. Ariviodisi, e simpri legris e mai passion!

CORISPONDENZE DI FLOREAN

O ricev e o publicri:

« *Glorios Florean* »

Vind savut che tu tu tornis a butâti fur, che simpri instancabilmentri tu us diverti e tal istess timp jessi util al puar e al debul cul dai paicuars a chiel che voressin metilu sott i pis e ingrassassi cul so sang, ti mandarai ance jo ogni tant qualchi storielle che riguardi il to programe.

Par cumò no puess contati altri che une me disaventure tociale al festin di sabide al Minerva.

Bisugne che tu sepi che jo soi un pitoc, ma plen di passion pal ball, e mi vanti di jessi un famos balarin tant di no tignimi apajat che di là tes fletis di prin ordin.

Soi restat giuliv al anzunzio di chest festin dulâ che radune il ver splendor dal biel sess che sedi te citat. Ma, come si fasial, pal bilgiel l'hai comodade cul meti in cros l'orloj. Pal vestit po l'afar l'iere plui imbrojat. Cenone, la velade, masse strete, la ciatai in t'un lug; i bragons, masse largs, di un'altre bande.

Coragio, e avanti. Jentri in teatro e soi restat unmont sconsiartat viodind dute che bieie corone di sioris che si ciassavin tant di voi une su l'altre.

Scomenze l'orchestre a dai di còt. Jo mi sintivi simpri plui a manciâ il coragio di domandâ une balarine e esponi la me strete, linde, smaride e untuose velade a lis teribils olaladis di dute la riunion feminil e ance maschil.

Jo, stuî di tirâ la gole, e butâ vie i bêt par sta sintat a cialâ a balâ, fasei un sfuars e invidai la prime che mi jere donge a fa un bal cun me.

Jè, dopo qualchi moment di indecision e acetâ.

Disgraziamentri si jere prossims a l'ore de refezion. I miei bragons, masse comus, mi colavin, e la velade, baland dave qualchi crich, robe che mi faseve vignl i sudors frees pe vite.

La balarine si pojave cun qualchi ripugnanze tor di me, come se ves indovinat dute la me miserabil condizion, e ce qualitat di cassele co jeri. Nol zovâ nance il miò balâ ben, par persuadele che jo no jeri di butâ t'un cianton.

Sune la une. Eco l'ore dal past, l'ore par me fatal. Come si fasial cull, disei, mi farai vignl mal di ciav o di panze, mi sintarai t'un palc, e buine sere, zà speri che ca dentri no sarai sol a provâ qualchi mal a cheste ore.

Passade l'ore de refezion e uarît dal mal fasei ogni tant qualchi bal finché sin rivas a la fin. Jo jeri estremamentri debul e par magior disgrazie la velade d'imprestît si jere discuside tor la manie.

Par fortune, nance apene finit il galopp final, la int e i sunadors jerin ancemò al puest, che han

lassat a seur il teatro. Jo profitai di chell favor par me, ma poc acolt di dutt il rest, me soi moccade cu la velade rote, i bragons che no mi stevin plu su e plen di fred.

Un to assiduo letor.

DA LA ZAE DI FLOREAN

Un zovenott, un buleto, che cumò al è lât tai soldas militars, mi par tai bersalgirs, al crod di vele sujade cussì in t'una facende assai delicate, dula che cu lis sos declarazions verbals e scritis al ha fatt nassi un ciadaldiaul in t'una famee e compromitut senze nissune reson t'una persone che no i jentrave par nuje.

Quand che al jere il moment di fassi indenant, il zovenot al si eclissà e no si lassà plu i viodi, ad onte che al foss stat replicatamentri clamât, anca da l'Autoritat giudiziarie.

Ma magiors detalgios su l'argument, par un altre volte.

Mi scrivin:

« Zà che tu has deliberat di tornà fur a svea i slett dormiens, no manciarai di dâ ogni tant qualche sciariment, di contâi qualche storielle, di fati dai comens sun che robe e sun che altre di publich interess; infati se tu mi acetis un dai tuel *reporters* ben vulintir lu fas, parceche o crod di fa ciosse util al popul.

« Par esemplio vorèss che tu scrivessis ai tuel letors come qualmentri ciartis tizis e fasin tropp a fidanze cui foresg e dopo e restin plenis senze vè il confuart di jessi stadis dal Sindich a pronunziâ il famos sî.

« Cussì ti contarès di une recent che ha vidielat doi pipins (folch che la vegni, doi a la volte!) e quand che spietave che il sposo al vès vût di fa il so dovè, invece e jè restade cun tant di nas e cûi pivei che si sâ. L'amigo intant al veve ciapat su i siei fagose vie lui. Ma par Joibe che ven ti contarai la storie genuine dall'a al zeta.

« Baste che ti disî che lis lengatis e sberlin: *visugne tornà a meti fur la sciepute par che al torni l'uscî!*

« Il galopin »

O soi ben grat al *galopin* des sos preziosis informazions da lis quals o ten cont unmont. Come che o ten cont des sos promessis ne la fiduzie che vignaran scrupolosamentri mantignudis.

Un'altra letare dal *galopin*, vigaude a l'ultimore, quand che al jere di meti in machine.

Anzi o visi i miei gentii corrispondens a volè impuestâ a timp lis letaris, par che no vevin di subi il ritard di une setemane.

Ma eco la letare dal *galopin*:

« Se tu has un poc di spazi tal to sfuei, no sta manciâ di reclamâ l'atenzion di cui spiete sore ciartis ciasis dula che si finin ciamaris amobigittadis a ciartis farfalis diurnis e noturnis, a ciartis

orizontals, che supin il sang, cioè i bez e la salut, a ciartis capos e flis di famee e che son la ruvine de zovenut.

« No sta manciâ di rimproverâ a cui spiete la poce sorveglianze in cui son tignudis ches ciasis, su lis quals ti farai pal prossim numar une descrizion clare e nete e in cheste ocasion ti contarai di un truchet succedut di poc, di une orizontale, alontanade da Udin entri tre diis in cause di une relazion...

« Ma no hai timp cumò di lâ indenant, e vè pazienze fin a uè vott. Mandi. *« Il galopin »*

Gnuys e sincers ringraziamens di Florean al brav e zelant *galopin*.

O ricev e o publichi tal e qual mi ven comunicade:

Ciar Florean

Dugg ti crodevin muart, ma invece tu durmiyis in pas spietand cè che disevin lis canals, par po saltâ fur cun un emporio di nuvitas, e meti a puest ju maldicens, i birbans, i fariseos ipocritis e lis lengatis iniquis.

Ance un tal crodind che la to vite e foss finide al si veve dat animo a sfogâ la so ire viars une persone di cheste citât, la qual tal 1884 e fo nominade da une Societat a riviodi i cons, cussì des de palanche. Sicome che i cons de palanche no corispuindevin a lis palanchis incassadis, e che il passiv nol corispuindeve cul ativ, l'incaricat al fasè lis dovudis osservazions dimostrand che il tal nol jere capaz nè poc nè trop di aministrâ palanchis.

Par chell tal che al crod di jessi un omenon, chestis pizzulis robutis i tocjarin il cur, e confidand in te to muart al si jere mitut a perseguitâ il revisor, non pensand che al faseve i cons senze l'ustir.

Chest o ti dis come proemio, ma in seguit ti comunicarai vite, muart e miracui sun ogni ciosse.

Ricev i salus dal to

Includat.

Florean us ha contat altri voltis di un original di buteghir di Puscuell il qual, quand che nol po tirâ i centesins di qualchidun che al ha di vè, senze tang complimens al tache sul balcon de buteghe tant di cartelon, cu la so brave marche di bol di 5 centesins, e i scriv parsore non, cognon, paternitat, dal debitor e l'impuart dal debit, par cui sar popul e done int e veguin a savè il pur da l'impur.

Lunis di cheste setemane dugg chei che passavin par Puscuell e han podut lêi chest cartel:

Il suonatore

ha quî imbrogliato

L. 1. 10

Udine 15 Febbraio 1886

Ce us parial di chest gnuv sisteme di berline adotât impunementri dal buteghir original di Puscuell? Diviar e domandaran se chest sisteme al è permitut. Mi par inutil la domande dal moment che il buteghir lu ha sperimentat tantis voltis senze che nissun lu disturbi.

VINCENZO LUCCARDI, *diretor responsabûl.*

Udin, 1886 Stamp. A. Montalbani